

Siunertaa suliassallu

§ 1. Naatsorsueqqissaartarfik Kalaallit Nunaanni kisitsisitigut paasissutissortarnernut qitiu-sumik oqartussaqarfiuvoq.

Naatsorsueqqissaartarfip siunertaraa:

- 1) inuaqatigiit ineriarornerisa misissoqqissaarneqarnerinut, naalakkersuinikkut allaffissornik-kullu ingerlatsinikkut aalajangjinernut, pilersaarusrornermut kiisalu inuaqatigiit ilisimatusarfigineqarnerinut paasissutissatigut tunngavissat qularnaassallugit,
- 2) paasissutissanik katersinissat, suliarinninnissat misissueqqissaarnissallu siunertaralugit periutsinik ineriarortitsissalluni,
- 3) paasissutissanik tunniussisartut attuumassuteqartut atuisullu suleqatigalugit kisitsisitigut paasissutissat tunngaviusut amerlisarneqarnissaannut kisitsisitigut tunngavissat pissarsiari-niarneqartarnissaat isumagissallugu
- 4) inuaqatigiit ilisimatusarfigissallugit - tassunga ilanngullugit pingaartumik aningaasaqarner-mut, inuussutissarsiornerup ingerlaneranut, inooqatigiinnermut, inuaqatigiit ajunngitsumik inuuneqarnerinut kiisalu inuit agguataarnerinut tunngasunik - Kalaallit Nunaannut pingaarutilinnik,
- 5) kisitsisitigut paasissutissanik inuaqatigiinni pissutsinut tunngasunik ingerlatitseqqittassal-luni kiisalu naatsorsueqqissaartarfip ilisimatusarnerinit paasisanik tamanut ingerlatitseq-qittassalluni.

§ 2. Naatsorsueqqissaartarfik:

- 1) kisitsisitigut paasissutissanik inuaqatigiinni pissutsinut tunngassunik katersisassaaq, suli-arinnittassalluni kiisalu saqqummiussisassalluni,
- 2) akilerneqarluni kisitsisitigut paasissutissanik katersuisinnaavoq, suliaqarsinnaalluni saq-qummiussisinnaallunilu kiisalu Namminersornerullutik Oqartussat sullissiveqarfii allat, kommunit, kattuffiit namminersortullu suliffeqarfiaat il.il. sinnerlugit ilisimatusarnernik ingerlatsisinnaalluni,
- 3) pisortat oqartussaasuisa nalunaarsuiffiisa, pisortat inuussutissarsiornullu allaffissornikkut suliaminnik ingerlatsinerannut atorneqartut, kiisalu kisitsisitigut paasissutissiornermut ator-neqarsinnaasut, aaqqissuunnerini atorneqarnerinilu isumaginnittuussaaq peqataalluniluun-niit,
- 4) ataatsimiitidianut ataatsimiititaliarsuarnullu kisitsisitigut paasissutissanik ikuussinnaavoq,
- 5) kisitsisitigut paasissutissanik misissueqqissaarsinnaavoq eqqoriaanernillu suliaqarsinnaallu-ni,

- 6) nunat tamalaat akornanni kisitsisitigut paasissutissanut tunngasutigut suleqatigiinnermi sulianik isumaginnittassaaq,
- 7) misissoqqissaakkanik saqqummersittakkat timitalerneqarnissaannut nalunaarsuiffinnik kisitsinernillu paasissutissanik toqqortarinntassaaq nutarterisassallunilu,
- 8) inuiaqatigiit ilisimatusarfigisassavai.

Imm. 2. Naatsorsueqqissaartarfik aammattaaq naalakkersuisut aalajangiinerisigut Namminersornerullutik Oqartussat allaffeqarfisa Inatsisartullu atugassaannik kisitsisitigut paasissutissanik pissarsiniarniarneq isumagisassavaa.

§ 3. Pisortat oqartussaqarfiat suliffeqarfialluunniit nalunaarsuiffiliornialerpat kiisalu kisitsisitigut paasissutissanik katersinialerpat suliaqarnialerpallu Naatsorsueqqissaartarfik ilisimatinneqassaaq aaqqissueqatigiinnissaq siunertaralugu.

§ 4. Naatsorsueqqissaartarfik ilisimatusarnerminit paasisaminik tamanut saqqummiussisussaattitavoq.

Naatsorsueqqissaartarfiuup aqunneqarnera

§ 5. Naatsorsueqqissaartarfimmut qulliunerusumik akisussaasussatut siulersuisunik toqqaasoqassaaq.

Imm. 2. Siulersuisut tallimanik ilaasortaqassapput inuiaqatigiinnik ilisimasaqartunik. Naalakkersuisut siulersuisunut ilaasortanik ukiuni pingasuni ilaasortaasussanik toqqaasassapput.

Imm. 3. Siulersuisut namminneerlutik suleriaasissiussapput.

Imm. 4. Naatsorsueqqissaarnermut pisortaq siulersuisut ataatsimiinnerini ataatsimeeqataasarutut peqataasassaaq.

§ 6. Siulersuisut pisortat kisitsisitigut paasissutissaataasa ataqtigissaarneqarnissaannut siunnersuusiusapput kiisalu Naatsorsueqqissaartarfiuup siunertamut aalajangersakkat naapertorlugit sulinera nakkutigissallugu.

Imm. 2. Siulersuisut Naatsorsueqqissaartarfiuup suliniuteqarfissamisut siumut pilersaarutaannik kiisalu ukiumut pilersaarutaanik akuersisassapput.

Imm. 3. Siulersuisut suliffeqarfiuup ingerlatsinera pillugit ukiumoortumik naalakkersuisunut nalunaaruteqartassapput.

Imm. 4. Siulersuisut siunnersuisartussanik ataatsimiititaliorsinnaapput.

§ 7. Naatsorsueqqissaarnermut pisortaq Naatsorsueqqissaartarfiuup ulluinnarni aqunneqarneranik isumaginnissaaq sullissiveqarfiallu avammut kiinnertartorissallugu.

Imm. 2. Siulersuisut inassuteqarneratigut naalakkersuisut naatsorsueqqissaarnermut pisorta-

mik toqqaasassapput.

§ 8. Naalakkersuisut Naatsorsueqqissaarfiup aqunneqarnera pillugu sukumiinerusunik malittarisassiorsinnaapput.

Aalajangersakkat allat

§ 9. Naatsorsueqqissaartarfiup tunngaviusumik paasissutissiorissaanut (§ 2, imm. 1, 3 aamma 6 naapertorlugit) kiisalu suliniutissaanut ukiumoortumik aningaasaliissutit aningaasanut inatsisikkut aalajangerneqartassapput.

Imm. 2. Aningaasaateqarfinnit aningaasat pissarsiat, avataanillu aningaasalersuinerit allat Naatsorsueqqissaartarfiup atorsinnaavai aningaasat atorneqarnissaannut siunertaliunneqartut naapertorlugit.

§ 10. Pisortat oqartussaqarfii Naatsorsueqqissaartarfimmit qinnuitigineqarnertik naapertorlugu kisitsitigut paasissutissiornermut suliassatut pilersaarutigineqartut aalajangikkat iluanni paasisutissaatigisaminnik nalunaaruteqartassapput.

§ 11. Inuussutissarsiummik ingerlataqartut, sulisitsisut, inissianik piginnittut attartortullu kiisalu kikkut nioqqutissanik nunanit allanit eqqussuisut taakkununngaluuniit nioqquteqartut, aamma Savalimmiunut Danmarkimullu, imaluuniit nunani allani aningaasatigut isumagisassaqartut Naatsorsueqqissaartarfimmit qinnuitigineqarnertik naapertorlugu paasissutissanik tunniussisassapput sullissiveqarfiup suliassatut pilersaarutini kisitsisitigut paasissutissiugassatut aalajangiunneqarsimasut suliariniarnerini pisariaqartitaanik.

§ 12. Naalakkersuisut paasissutissanik Naatsorsueqqissaartarfimmut tunniussisarneq pillugu malittarisassiussapput.

§ 13. Inuit ataasiakkaat suliffeqarfiilluuniit ataasiakkaat pillugit paasissutissat Naatsorsueqqissaartarfiup §§-ini 10 aamma 11 naapertorlugit pissarsiarisai allanut ingerlateqqinneqassanngilat.

§ 14. Piffissaq eqqorlugu paasissutissanik § 10 aamma 11 naapertorlugu piumasaqaatigineqartunik piffissaq eqqorlugu tunniussinngitsoq, piaaraluni imaluuniit mianersuaalliorujussuarluni paasissutissanik eqqunngitsunik tunniussisoq akiliisussanngorlugu eqqartuunneqarsinnaavoq.

Imm. 2. Unioqqutitsineq aktiaateqarluni ingerlatseqatigiiffimmit assigisaanilluuniit pisimappat ingerlatseqatigiiffik taamaannermisut akiliisussanngortinneqarsinnaavoq.

Ikaarsaariarnermut, atortuulersitsinermut atorunnaarsitsinermullu aalajangersakkat

§ 15. Siulersuisunut ilaasortanik qinerseqqaarnermi ilaasortat marluk ukiup aappaa avillugu ilaasortaasussatut toqqarneqassapput.

§ 16. Inatsit 1. januar 2000 atuutilerpoq.

Imm. 2. Tamatumunnga peqatigitillugu Kalaallit Nunaanni naatsorsueqqissaartarneq pillugu Inatsisartut inatsisaat nr. 5, 19. juli 1989-imeersoq atorunnaarsinneqarpoq.

Namminersornerullutik Oqartussat, ulloq uu. qqqq 1999

○ Jonathan Motzfeldt

/

○ Josef Motzfeldt